

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

1. प्रधानमंत्री नरेन्द्र मोदी होर अज्ज बडलै 11 बजे अपने रेडियो कार्यक्रम “मन की बात” राएं अपने बचार लोकें कन्नै सांझे करगंन।
2. गृह मंत्रालय नै पहलगाम आतंकी हमले दी जांच दा कम्म राष्ट्रीय जांच अजेंसी एनआईए गी सौंपेआ ऐ।
3. उपराज्यपाल मनोज सिन्हा होरें पहलगाम आतंकी हमले बारे चर्चा करने लेई कल विधानसभा दी विशेष बैठक सददी ऐ।
4. पहलगाम आतंकी हमले दे बाद मुल्खै दे बक्ख-बक्ख हिस्सें च जम्मू कश्मीर दे नागरिकें दी सुरक्षा जकीनी बनाने लेई जम्मू कश्मीर दे मंत्री बक्ख-बक्ख राज्यें दे दौरे पर न।
5. सुरक्षा बलें दे इक सांझे अभियान दरान कुलगाम च आतंकवादिएं दे दऊं सैहयोगी फगड़े गे, थेआर ते गोलाबरुद बी बरामद।

<><><><><><>

PM-MKB

प्रधानमंत्री नरेन्द्र मोदी होर अज्ज बडलै 11 बजे आकाशवाणी उप्पर मन की बात कार्यक्रम च अपने बचार सांझा करगंन। एह इस मासिक रेडियो कार्यक्रम दी 121मीं किश्त होग। आकाशवाणी ते दूरदर्शन दे समूलचे नेटवर्क, आकाशवाणी समाचार दी वैबसाइट ते न्यूज़ ऑन एआरआर मोबाइल ऐप उप्पर कार्यक्रम दा सिद्दा प्रसारण होग। आकाशवाणी समाचार, दूरदर्शन समाचार, प्रधानमंत्री कार्यालय ते सूचना ते प्रसारण मंत्रालय दे यूट्यूब चैनलें उप्पर बी एहदा सिद्दा प्रसारण होग। आकाशवाणी जम्मू थमां हिंदी प्रसारण दे तुरत मगरा मन की बात कार्यक्रम दा डोगरी च प्रसारण होग। डोगरी प्रसारण तुस रातीं 8 बजे इक बारी परतियै सुनी कसदे ओ। अज्जै दी मन की बात कार्यक्रम पर इक परिचर्चा रातीं साढ़े 10 बजे साढ़े इस्सै चैनल पर प्रसारत कीती जाग।

<><><><><><>

MEA NIA

गृहमंत्रालय नै पहलगाम आतंकी हमले दी जांच राष्ट्रीय जांच अजेंसी एनआईए गी सौंपी दित्ती ऐ। सूत्रें मूजब हुन अजेंसी आतंकी हमलें दी घटनाउ दी औपचारिक जांच करग। एह्दे शा पैहले एनआईए दी टीम नै आतंकी हमले आली थाहर दा दौरा कीता हा। एह् हमला इस म्हीने दी 22 तरीक गी जम्मू कश्मीर दे पहलगाम दे बैसरन जांगली खेत्तर च होआ हा जेह्दे च 26 लोक मारे गे हे ते केई होर जख्मी होई गे हे।

<><><><><><>

Centre Advisory

सूचना ते प्रसारण मंत्रालय नै सब्बने मीडिया चैनलें लेई परामर्श जारी कीता ऐ। जेह्दे च उनेंगी राष्ट्रीय सुरक्षा दे हित ते आतंकवाद रोधी अभियानें ते सुरक्षाबलें दी गतिविधियें दी सिद्दी कवरेज थमां दूर रौहने दी सलाह दित्ती गई ऐ। मंत्रालय नै मीडिया गी रक्षा अभियानें या गतिविधियें कन्नै जुड़े दे स्रोत आधारित सूचना पर रिपोर्टिंग करने थमां बी गुरेज करने दी सलाह दित्ती ऐ। मंत्रालय नै आखेआ ऐ जे समें थमां पैहले गै संवेदनशील सूचनाएं दा खुलासा, देश विरोधी तत्वे लेई मददगार साबित होई सकदा ऐ ते अभियानें दे प्रभाव ते सुरक्षा कर्मियें दी सुरक्षा गी खतरे च पाई सकदी ऐ जे मुंबई आतंकी हमले, कारगिल युद्ध ते कंधार हाईजैक घटनाएं च बिजन रोकटोक मीडिया कवरेज कारण पेदे माड़े असर गी ध्यानै च रखदे होई सब्बनें गी जिम्मेदारी आली भूमका नभाने दी सलाह दित्ती जंदी ऐ।

<><><><><><>

LG-Special Session

उपराज्यपाल मनोज सिन्हा होरें कल 29 अप्रैल गी जम्मू कश्मीर विधानसभा दा इक दिने लेई इक विशेष इजलास सददेआ ऐ जेह्ड़ा पिछले दिने पहलगाम च होए दे आतंकी हमले बारे चर्चा करने लेई ऐ जेह्दे च 25 सैलानी ते इक मकामी बसनीक मारेया गेआ हा, इस विशेष इजलास लेई गुजारश 23 अप्रैल गी मुख्यमंत्री उमर अब्दुल्ला हुंदी अध्यक्षता च लग्गी दी कैबिनेट दी बैठका च कीती गई ही। विधानसभा दी इस विशेष बैठका च आतंकी हमले च मारे गेदें गी श्रद्धांजलि दित्ती जाग, हमले बारे चर्चा कीती जाग ते इस सरबंधी होरने विषे पर बी गल्लबात कीती जाग। एह्दे इलावा इस जालमाना कारवाई दी सख्ती नै निंदेया करदे होई इक प्रस्ताह बी पास कीता जाग। विधानसभा दा एह्दे शा पिछला इजलास “बजट सत्र” हा जेह्ड़ा 9 अप्रैल गी खत्म होआ हा।

<><><><><><>

Beating Retreat(Undertone)

बीएसएफ दे जवानें कल आर.एस.पुरा सेक्टर च ही शनिवारें लगने आली बीटिंग रिट्रीट सेरेमनी दरान, पहलगाम आतंकी हमले दे शहीदें गी श्रद्धांजलि भेंट कीती, जेहदे राएं मारे गेदे लोकें दे परिवार आले कन्नै सुरक्षा बलें दी हमदर्दी गी प्रगट कीता गेआ ऐ। एह आयोजन राष्ट्र दी रक्षा ते सुरक्षा गी जकीनी बनाने लेई सीमा सुरक्षा बल ते होरने बलें दी निष्ठा दा बी प्रतीक ऐ.

<><><><><><>

Ministers Deployed

उपमुख्यमंत्री सुरिन्दर चौधरी होर कल मुंबई च महाराष्ट्र दे उपमुख्यमंत्री एकनाथ शिंदे होरें गी मिले ते राज्य च रवा करदे जम्मू कश्मीर दे बसनीकें दी सुरक्षा लेई कीते गेदे प्रबंधें पर संदोख प्रगट कीता। शिंदे होरें उनेंगी भरोसा दोआया जे महाराष्ट्र च पढ़ाई जां कम्म करा'रदे जम्मू कश्मीर दे लोकें गी पूरा समर्थन ते सैहयोग दित्ता जाग। तोआई मंत्री सकीना इत्तू होर पंजाब दे गवर्नर गुलाब चंद कटारिया होरें गी मिलियां ते राज्य च जम्मू कश्मीर दे विद्यार्थिएं, कारोबारिएं ते होरने लोकें दी सुरक्षा बारे गल्लबात कीती। उनें इंदे चा केई लोकें कन्ने मलाटी बी कीती।

राई—बाई मंत्री जावेद अहमद डार होरें हिमाचल प्रदेश दे मुख्यमंत्री सुखविंदर सिंह सुक्खू होरें गी मिले जिनें उनेंगी जम्मू कश्मीर दे लोकें दी सुरक्षा दा जकीन दोआया। मंत्री जावेद अहमद राणा होर उत्तर प्रदेश दे केई सरकारी अफसरें कन्नै मिले जिसलै जे मंत्री सतीश शर्मा होरें देहरादून जाइयै उत्थें रवा करदे जम्मू कश्मीर दे विद्यार्थिएं, कारोबारिएं कन्नै गल्लबात बी कीती।

<><><><><><>

Rana Indus Water

लखनऊ दे अपने दौरे दरान मंत्री जावेद अहमद राणा होरें सिंधु जल समझौते बारे गल्ल कीती ते एहदे खित्ते पर असर बारे अपनियां चिंता जाहर कीतियां। उनें आखेआ जे खित्ते दे लोकें गी अपने संसाधने जिंदे च दरेया ते कुदरती साधन वसीले शामिल न, दा लाह थोना लोड़चदा।

पाकिस्तान दे सियासतदान बिलावल भुट्टो जरदारी हुंदे ब्यानै बारे मंत्री होरें आखेआ.

<><><><><><>

Kulgam Terror Associates

सेना, सीआरपीएफ ते कुलगाम पुलस आस्सेआ सांझे अभियान दरान आतंकवादिएं दे 2 सहायकें गी गिरफ्तार कीता गेआ ते उंदे कब्जे थमां असला बरूद बरामद होआ ऐ। दौनें दी पंछान बिलाल अहमद भट्ट ते मोहम्मद इस्माइल भट्ट दे तौर पर होई ऐ, दवै थोकरपोरा दे रौहने आले न। तपाशी दरान असला बरूद, जेह्दे च 2 पस्तोलां, पस्तोल दे 25 रौंद, पस्तोल दियां 2 मैगजीनां उंदे कब्जे थमां बरामद होइयां। सरबंधी दफाएं तैह्त्त उंदे खलाफ पुलस स्टेशन कार्ईमो च मामला दर्ज कीता गेआ ऐ ते अगड़ी जांच कीती जा'रदी ऐ।

<><><><><><>

Kishtwar DC MLA

किश्तवाड़ थमां विधायक शगुन परिहार ते किश्तवाड़ दे जिला विकास कमीशनर रोजश कुमार शवन होरें कस्बे दा व्यापक दौरा लाइयै नागरिक सुविधाएं कन्नै जुड़े दे मुद्दे दी समीक्षा कीती, जिंदे च बिजली ढांचा, नालिएं दी बवस्था ते बजार प्रबंधन बगैरा शामिल हे। दौरे दरान उनें मकामी लोकें कन्नै मलाटी कीती, उंदिएं दिक्कतें शकैतें गी सुनेआ ते उंदी हर समस्या दी बिनाह् पर नबेड़े दा जकीन दोआया। डिप्टी कमीशनर होरें आखेआ जे प्रशासन लोकें गी हर मयारी नागरिक सुविधा उपलब्ध कराने लेई वचनबद्ध ऐ।

<><><><><><>